

劉

孟

塗

集

孟塗後集卷六

桐城劉開明東

曉望

白雲山色入城樓一路煙嵐接嶺頭地僻鳥知林壑趣潮來風
送海天愁登高賦豈因長別弔古人還愧壯遊辛苦珠江歌舞
處年年芳草自中洲

紀游

越城四畔盡名園燈火千家紫鳳喧香月迷空天亦醉珊瑚薰
日海疑溫泛舟入浦花臨席出郭看山翠落門若使安期真愛
靜仙踪不向白雲存

謂白雲化

望浴日亭

遠遊看遍萬山青到此翻疑近帝庭海畔雲深留早日天南地

盡出孤亭何時灑酒澆蒼翠有客題詩付杳冥矯首赤龍祠宇
在炎荒莫便燭威靈

夢游羅浮

我來嶺表踰十旬朝朝思探羅浮春詩天酒地苦羈滯凡骨未
換衣生塵精誠結想神見憫鮑姑入夢回颺輪道我御風行空
曼霓裳羽蓋前紛陳靈區將到雲先親忽然神光夜四燭千山
萬嶺生金銀絕頂星河時蕩漾雲多著地鋪平障風吹雲動地
生浪我因望海要分明直立三千六百丈飛雲峯聳山之隈花
村中有前朝梅師雄樹下曾啣杯君醒已久我夢來綠衣童子
安在哉美人素服光徘徊芳香襲人今疑猜花神遇合不可再
可惜趙生猶几材更訪萬仙入雲際抱朴居處極奇麗爾我同
負著書名一在雲霄一塵世朱明洞古別有天我欲徑入洞中

眠劈開山骨穿蒼煙直從石底窮其巔毒龍吐氣不能近滿身
濕沫如細泉鮑姑笑我何太怯探深恐被寒雲壓羅浮山頭四
百峯峯峯都向雲中插玉關璇房曲復斜七十二所多奇花瓊
瑤眷屬住難遍其餘盡爲蝴蝶家蝴蝶雖仙不孤宿美艷濃情
炫芳谷黃鵠高飛恨別離鴛鴦長聚笑踞促何如此蝶能通靈
五色霞光擁翅輕山居豈竟乏人物卻教蟲族擅奇名飛翠截
人來去路天風助我高吟聲此時寺鍾將報曉夢飲瓊漿香未
了撥開紫蘚數千重冷岩遺落知多少山僧出揖爲傾倒怪余
此游胡不早山有神芝秋未老十圍竹大人腰小萬綠積空風
不掃勝景游人苦未探坡老當時亦草草我今歸自山中央十
載情懷一夜償風打落葉聲蒼蒼覺來霧氣沾衣裳夢中境濶
時日長吁嗟人世徒匆忙

將歸留呈礪堂尙書

敢誇攬勝嶺雲東千里長游爲謁公芳秀亦教親皎日寒林竟
許傍春風地逢知己翻難別詩寫離情轉易工去向西江更南
望龍門一代屬元戎

高軒忽報錫瑤章讀罷雲霞爛錦裳一劍今方逢薛燭十年前
已識歐陽憐才不厭儒生拙論古能容我輩狂幾度束裝猶未
決片雲終戀斗樞旁

我舟欲發尙含情珠海無言暗有聲嶺上已教開宿翳江南好
自認歸程廿年白雪遐方重一笑黃河此日清辭別東風行又
卻沿途長看大星明

題小松長夏讀書圖

久與世塵隔滿庭芳草深一編消永日片石坐濃陰靜者不知

暑古人餘此心風來猶未覺讀罷任蟬吟

黃鵠行

黃鵠游寥廓將欲周八方一舉雖千里天路終難量飛飛遇同
飈吹至南海旁南海信邈遠喜近朝日光晴和爲噓拂身得依
扶桑愧以湖海姿謬比鸞與鳳邊境多炎風十月無飛霜毛羽
未云落中心爲傍徨豈無鴻雁侶遠隔江水長豈無翡翠羣近
向珠樹藏哀音阻遐域麗采隱南荒顧茲兩翮微乃蒙當風揚
驚喜畏久留匪曰思故鄉感戀春陽恩欲去仍回翔願啣承露
草長集丹山陽

望遠簡石甫

城郭迷茫正曉曛越臺直上挹晴氛地偏轉自多春色天遠無
邊沒海雲濁酒十千容我醉客懷一半向誰分薄游縱是飄蓬

甚放眼江山尙有君

寄懷左篴菽

一春風雨悵離羣兩載江關獨憶君
昨夜夢君曾共飲酒痕猶濕日邊雲

酒樓贈石甫

逢人動說歸買山腰下時無沽酒錢
珠江城畔好風日辜負眼前人
少年姚子邀我出門去坐我粵秀山
高處啼鳥紛紛不知數弔古蒼茫生
遠愁海日不見見紅霧歸來直趨酒
家樓東風吹到樓上頭且飲美酒傾
金甌懷抱縱橫無處用醉鄉爭長求
封侯樓前花枝嬌欲語春寒勒住未
全吐東君不爲汝作主一任玉顏經
宿雨客中芳意本闌珊見此聊復舒
笑顏憶昔看花卧鄉關看弄青鳥招
白鷗今茲同客天海閒瘴雲滿身來
偷閒

呼童命筆將愁刪此杯容易盡歡樂我行別汝扁舟還酒酣更訪故人宅醉歌月落話終夕腸中芒角生徑尺煙雨淋漓垂滿壁

寄懷韓二葆光時在貴陽

萬里黔陽路重光劈巨靈雲歸苗洞黑天接蜀山青客久心情薄崖深日月停邊荒足春色蘆管共誰聽

喜遇張南山孝廉

嶺南二月天寒微嶺南游子初言歸東風不送客愁去一任飛花紅滿衣城西年少昨相識痛飲狂歌傾倒極歌罷暮寒生紫瀾海雲爲我變顏色

留別石甫

黃鶴胡爲歷九州炎方煙景故多愁風塵閱遍吾還拙江海游

窮汝獨留詩思入雲猶上軌歸心阻水恨南流臨岐各自無他
語記取今番是黑頭

贈江石生

梧竹同棲愧鳳皇拂衣天日正蒼茫多才不幸爲詞客握手無
多況異鄉別促歡情爭曉夜歸遲春思老炎荒扁舟莫羨吾先
發前路山川去更長

酬張南山孝廉

展我碧瑤箋書君白雪篇孤花艷春色空翠點晴煙此筆自今
古有人來海天相逢無限意留記暮雲邊
痛飲不知醉新交轉易愁行藏看一別邂逅足千秋有志矢天
日高文齊斗牛遲迴江上路卻是爲君留

留別馮幹常明府

身世蒼茫共此時相逢莫認是新知
勞人不合投喧地倦鳥非關戀故枝
弔古愁宜攜酒破論交君恨識吾遲
書生動說千秋志珍重忽忽別後期

歸至江右

出嶺覺寒重征途春意乖
關河磨病骨風雪破孤懷
怪石岸旁立好山雲外排
所嗟歸路遠難共鳥飛偕

擇交行

青山不肯趨就人往而從之乃相親
朝朝面對顏色新刻盟可
以支千春流水宛轉隨人去有情
更赴斜陽渡繞我梅花三百
樹已過門前不復住縱有風吹肯
回顧從我順我非君子可憐
物態皆如此山水向背看分明
請君于此悟交情

暮春江樓感賦

縹渺飛樓立水濱登臨風雨惜良辰無多春色償年少不佳江
聲送古人身世漸隨陳跡遠煙花爭入客懷新一樽薄酒遲歸
路尺素殷勤去雁頻

江岸獨立

夜永露無聲微雲古木橫峯孤疑地立野曠覺天平客久憎山
水詩成憶友生暫游情未已況復事長征

龍眠山中

言採元芝露誰擎碧玉瓶卷衣沾濕翠劈水碎浮星春暖花長
醉山深草易靈好招素心友揮手拾遙青

贈僧

老僧對坐話浮生方外憂時忽不平靜久風塵拋舊夢興來歌
泣亦人情乾坤有我愁難遣仙佛無家願易成不見龍潭深處

月天風吹盪自空明

山行

寒散青煙外人歸古寺中山光借朝日鳥語答春風洗酒杯猶綠煎茶火正紅林居多樂趣長覺四時同

感賦

雲水升沉各宿因枯林曾見著花新眼前奇士誰爭命事後庸流善論人成敗分明憐往迹年華催逼又今春濁醪醉罷他何願日暮江天有釣綸

時有松江垂釣之約

到家得句

東風吹絮雨絲絲春事初闌客未知燕子歸來簾正捲小樓人倚落花時

續團扇詩

爲君歌團扇，今秋復來年。但留置巾笥，何妨暫棄捐。

抵金陵

玉樹瓊枝久寂寥，秦淮五度聽吹簫。一圭棄粉迷三楚，半局殘棋盡六朝。大令歌詞沉暮雨，莫愁居處近寒潮。胭脂巷口斜陽晚，更訪青溪到板橋。

得張小阮書有懷

鵬飛北去雁南征，兩地迢迢共旅情。別後書從今日到，愁中春似隔年生。舊游故國悲年少，同學長安幾宦成。霄路致身君努力，青山吾已事躬耕。

家居

閉門久已謝名流，無復梁園雪夜游。幾處雲山親客夢，一番花鳥蕩春愁。招來海月時傾酒，別卻江天不上樓。十五年來無此

日孤他風景木蘭舟

長河

長河西畔野橋東煙繞前村曲逕通近水月華移岸樹傍門山
色獻春風飛花入眼添新句舊雨關心託去鴻爲報倦游歸未
晚詩懷零落雨聲中

小園

小園煙景費平章久客居偏戀故鄉伴我不嫌唯缺月照人最
好是初陽花含宿暈紅侵蓋竹破春寒綠上牆猶有江南風味
在人生何必慕殊方

麻山

所樂在邱壑徑深宜避喧溪流長自轉山鳥竟忘言春色不到
寺樹聲疑在園領來塵外趣不必掩蓬門

逆旅夜飲

痛飲終何事長吟破杳冥醉懷忘月黑夢境入天青鳥宿藏深
霧風高走亂星角聲吹莫急獨客酒初醒

牡丹

客中久已負良辰今日樽前轉覺親好景看來原借葉天香開
後更無春爭妍偏讓羣芳早相對都忘我輩貧漫道前賢佳句
少名花自古費詞人

咏牡丹詩
古罕佳者

園居

十畝幽人宅疎籬護短牆栽花齊竹瓦掃葉淨松房愁認紅千
樹春浮綠半塘由來三逕好况復近斜陽

植起千竿玉沽來半甕春無風能引客有月解窺人水曲重重
抱山開面面新園林高卧久花鳥亦相親

白舫長橋下青驄古渡邊
岸花長帶笑煙柳不禁眠
野市春無主良宵月可憐
故鄉風景在猶幸及芳年

記得迴舟日堂前笑語親
乍歸翻是客小住亦因人
細檢書中蠹塗模壁上塵
留題無別意珍重歲華新

三月花飛盡溪溪漲碧潭
落紅肥野雀嫩綠飽春蠶
小閣香初暖東風夢欲酣
只愁河畔柳又送到江南

春閨

草綠溪南境深闌日正妍
闌花春炫爛取鏡月嬋娟
舊事香歸夢新愁字濕箋
飛花隨處好偏上鬢雲邊

拾芳驚蛺蝶臨水戲鴛鴦
月影收雙袖春雲貯上囊
剪蔬供夜飲洗露潔晨妝
猶恐蘭縑薄當軒怯嫩涼

六載悲長別曾勞嘆遠行
寒從衣透骨貧到我離卿
黃蘗嘗應

遍青梅看又生不因今夕聚誰共數歸程

蜀錦迴文字燈前認幾回水雲成繾綣花鳥各驚猜痛飲非關
福爲歡亦費才春風從此住杜宇莫頻催

桐城劉開明東

豔歌行

今夕復何夕置酒會羣仙車馬紛在門香風生管絃中堂設華
燭紫焰含青煙鴛鴦舞階下鸚鵡飛屏邊珊瑚枝十二爛熳照
錦筵酌酒未云滿美人來翩翩一顧未須與意態已萬千秋雲
媚孤影春月麗芳年被服何窈窕文翠與玉璫遠望且愁絕相
見况流連嬌羞不自勝隨風欲飛騫不厭歌聲久但恐歲景遷
容華古所爭良時及春妍冶豔世共惜幽怨誰爲傳感君辱回
盼含意難具宣銜辭鬱未吐精魄達君前玉手奉瑤卮守宮紅
尙鮮主人顧之喜謂客且遲延此樂未易極漏盡莫言旋起視
明河曙三星光在天他日思君勞爲歡今勉旃

出縱江

青山留不住去去此江洲一水流春色孤帆掛客愁波濤催彩鷁心事愧沙鷗岸草頻年綠王孫尙遠遊

江樓

抱郭樓臺夕氣佳客吟終日坐高齋江深雲水寒詩境春晚煙花渴酒懷捲起疎簾延素月拋將斷墨灑蒼崖仲文失職猶名達底事婆娑嘆老槐

哭張小阮孝廉

掉首君何速吾鄉失此才已虛千古事豈爲一人哀靈氣還川嶽雄心付草萊魂歸如念我多向夢中來

握手秦淮路人天一別中每宵望歸鶴今日哭秋風離思三年

積交情片紙終

去冬得都門寄來一書遂爲絕筆

可憐江上月存歿此心同

生後名何用文章轉悞身我嫌君早遇天忍德無鄰病骨支秋
氣嘔心對古人竟教銜恨死遺草字酸辛

莫向長安笑男兒喪異鄉

君卒于京師

風雲驚慘淡骨肉慟倉皇爾

我情猶昨寫霄路已茫酒爐共游處重過有餘傷

偶感

馬首江城又一方平原暮靄入青蒼山經夕照林皆紫天帶晴
雲月亦黃歌管極聲唯怨慕炎風到客竟悲涼無端傾得孤村
釀醉眼微茫認故鄉

憶昔

仙風吹夢酒初醒憶上江天第一亭湖月四圍秋入鏡山花半
面錦生屏微軀亦與千秋勝歲景曾無半日停離思祇今歸斷
壑莫將踪跡問空青

短歌行

我既不能入海斬長鯨海波如山一劍平又不能懸崖絕壁刺
猛虎深林人免夜行苦十年學劍竟無成徒有天涯詞賦名毛
錐豈了男兒事徑須棄汝關塞行人言奇困或爲福不遣紈綺
眩心目膏梁滌盡存素蓄天將脫汝芟荷服我笑不應但捫腹
孤松獨立岩壑隈蒼龍矯健非凡才風雪無端天際來凌雲氣
勢忽低催此時生意安在哉

途中感賦

擬同桂樹隱陽阿無奈東風喚渡河名勝每輕千里別客途翻
覺一身多炎暉驛路思松竹明月家山冷薜蘿獨羨匡廬三疊
外有人高唱紫雲羅

抵星渚偶成

曾掃松煙掩竹關市居惟借酒開顏破愁忽作江南客逐熱來
看鏡裏山人與暮雲同路出詩和春恨一時刪故交乍見驚相
問消得煙波幾日閒

憶浮山寄光栗園比部

我別浮渡六七年夢魂空繞山之巔山靈怪我久疎濶崖中新
景無與傳上負金谷之瑤草下負滴珠之靈泉賴君有詩鐫蒼
煙攜歸可以傲龍眠君往山中見幾度踏遍紫霞關外路醉上
仙床抱月眠醒來渾身是雲霧更披苔蘚履瀑布搜尋不怕仙
靈怒穿來險徑入雲根割取飛嵐作奇句語君勿更逞豪素半
牕有知應相妬自君去後鎖煙樹我思此山臨河濱中藏造化
千餘春隔雲遙望了無異真奇不肯出示人大江南北山連起
半倚青天半在水若將神巧持相比但恐衆山羞欲死唯有匡

廬黃海與九華較此奇境或更加雄濶過之靈不及名山各自
成一家憶我幼時宿山裏匆匆未得窺全美作詩曾使山靈喜
別來數載隔千里此山屹立還如此人跡窮遍奇未已今欲再
游君去矣君既赴官至幽燕我復浪游彭蠡邊愛山不見心長
懸峯巒無足來人前自是風塵願相左蓬壺十日往未果碧花
開老洞門虛莫道白雲不念我我今有術游何難端坐不用驂
青鸞下筆風馳走急湍驅來疊嶂如龍蟠蒼翠淋漓紙上寒尺
幅之內林壑寬願分一半寄君看

寄家書

珍重新箋幾日裁高堂盼到見時開有書難寫方爲恨生子能
游便不才失志文章同棄璧感時意氣辭驚雷千行綬說他鄉
事報罷平安報未回

陸生行贈子愉

吁嗟陸生年二十當時天骨已森立沉思力探造化機時奇不顧神靈嫉與余夙昔稱新知獨以隻字相友師世人毀譽兩不恤此中甘苦惟自知卽今壯歲尙同調縱酒高談氣騰蹕相逢歡笑異昔時人生聚散珍年少少年努力策高足凌雲辭賦工無益扶桑日出天路開長安卿相皆異才吁嗟陸生今莫哀

懷宮鐵橋

昔年河畔別君時花破愁顏柳折枝今日章門秋老盡滿湖煙水雁飛遲

贈吳長卿

吳生長余齒五歲與余少小耽奇麗筆底何知近世人眼中惟有古時淚金陵八月秋景鮮秦淮花月喧歌船生也去之若塵

士叩門就我窮幽元坐剖天關抉瓊髓深談僮僕皆酣眠人生
歡會豈易得爾時意氣自無敵高吟不覺來悲風輟酒往往爲
歌泣同游諸子多爲郎車服錯落生輝光天馬肯易受人顧卽
今得路寧遲暮爾我生來骨相同樽前感慨論遭遇吳生今卧
滄江湄身有長劍光陸離奇才抑塞自古悲酒酣斫地嗟何爲
閨情

怨極翻無語妝成轉自嫌爲春減顏色不是愛垂簾

懷陳大治

蕭蕭絕漠出龍媒自昔論文各草萊白雪竟教誰共曲青春偏
惜汝多才長安近日居非易年少辭家別總哀早寄江東春樹
句客心遙待楚王臺

寄懷雲郎

水氣昏終畫霞光落半天游非今日意貧畏故人憐波淺鷗移
宅山深鶴記年碧桃多少樹拋擲付蒼煙

聞笠瓢少司寇出撫閩中詩以寄之

使者承

恩靖八閩節樓風動浪雲春防邊豈恃重關險障海能清內地
塵東越山川原重鎮南天門戶仗儒臣不須更數辛安撫今日
朝廷已得人

武夷峯勢聳千尋悵望雲邊思不禁一代才名空世賞半生詩
境入秋深長鳴難盡窮途感潦倒翻孤愛士心憶自旌旗南北
去

謂自江右移節楚
南旋入京師

春風遙隔玉山岑

星子署中偶詠

一室容高卧湘簾捲素波傍山雲氣濕近水夜涼多芳意憐青

桂幽情謝碧蘿不知彭蠡雁消息近如何

好友離仍合詩情斷復連暑侵難盡飲客慣辜安眠明月不隨
水夕陽長帶煙吟來愁幾許消此日如年
今夜團圓月當牕似有情照人生寂寞對我故分明小別歡初
減新涼夢易成燈花綠底事相伴到殘更

寄懷吳丈士表

回首鄉關隔翠微深談猶記對斜暉別來山水遊成癖話到升
沉計各非逸氣君猶天馬健離情我看塞鴻飛年華老大疎狂
甚檢點心情坐釣磯

謂移居
銅陵

寄張介石

焚香煮茗對琴書佳句吟成月上初想見池波風起處藕花香
直閉門居

入廬山重登黃崖

攀崖重上碧雲端足下奇峯盡倒看石聳入天無盡勢瀑飛墮
地有餘寒崔嵬巨碣蒼苔沒浩蕩明湖夕照寬謂鄴湖灑酒臨風
感陳迹七年此地跨青鸞

寄懷楊惕吾

曾踏江南嶺萬重故園卻恨未相逢如何春雁今纔過又見衡
陽字一封

我家桐梓秀峯巔君住湘江楚渚連正有相思千里共暮雲遙
接洞庭邊

送原亭尙書之陝甘任

詔書昨向斗南宣秦隴從公借幾年溥海上游推此地
至尊西顧重安邊雕旗路指關門柳曉日晴開太華蓮此去中

原最高境近天應覺

五雲偏

青海黃河拓鉅觀
論功須向古長安
一關形勝開天府
八水波濤護將壇
玉女妝隨秋色麗
仙人掌帶暮霞看
知公布化回春早
消得邊城六月寒

南國爭傳召伯歌
甘棠植遍樹陰多
來時秀挹匡山色
去後恩深左蠡波
千古勲名爭隴塞
九重付託界山河
誰知舊日登龍客
又向紅蓮府外過

秃筆和友人韻

使盡江郎力誰云
露未乾有人才思減
此處陣雲殘脫穎
平時易生花晚景難
本來風雨快棄擲
有餘寒

昔作中書久如何
罷老成文會親閱
歷墨向濕縱橫
世俗爭毫

未春光暗管城相看情不厭只有舊儒生

夏日卽事

披襟又上木蘭堂暫對薰風展畫箱
山色當門疑近暮雲陰到地欲生涼
狂歌不覺林花落濁酒難消夏日長
久客倦懷開未得一城煙月待平章

過友人居

秋淨青霄迥雲棲碧樹多山光碍樓閣
池影入星河簾捲知風定身閒喜客過
幽居足娛日不必覓煙波

重經棲賢寺

連峯後聳勢嵯峨幽邃唯宜野鳥過
高閣露涼知月上深山落葉覺天多
千年佛尚存遺迹寺藏舍利三峽橋仍響怒波
不識前溪沙上路金淵玉井字如何

歸途過五老峯下

五老立空際奇峯絕更連天形眠石上秋色倚雲邊冷翠遠侵日崇崖深鎖泉重來煙靄處朶朶認金蓮

得阮芸臺中丞書詩以奉荅

客歸漸與世情疎修竹涼風伴素居何意論才空四海早勞飛使寄雙魚秋生極浦寒潮晚人到潯陽暮雨初但願元戎能得士山中何惜洞雲虛

游白雲崖

我被白雲引來從崖下游此身疑出世古佛不知秋寺冷僧偏熱山貧客亦愁生平慕幽境豈惜一宵留

山中度重陽值雨

懸崖直上阻追攀破笠青衫獨往還地有文章酬令節天移風

雨就名山搜羅靈異三秋盡消受清涼一日閒解識白雲深鎖
處故園不羨紫霞關

謂浮山

頻年夢想接神皋陟嶺寧辭百里勞小住何妨成暫隱興來原
不爲登高愁中節候驚秋變倦後詩歌借酒豪今日菊花須插
盡由來勝事屬吾曹

游三公山

高空走飛壁散作萬重峯日色不通曉秋容常自濃簷高壓松
栢石破出芙蓉我欲呼鸞鶴靈棲失舊踪

傍竹成村落尋僧作比隣人家終日靜樹木四時春泉影定時
古煙痕斷處新山靈如有識應嘆景沉淪

潭深不見底龍卧已千年一水劃蒼翠三峯開洞天無花空石
竹攜杖惹雲煙何日遂初約誅茅倚澗邊

宿寺

衆山深處絕塵喧自挂孤藤倚寺門
徑轉怪峯如鬼立夜深老樹作人言
流泉不着微雲影斷壁長留宿雨痕
唯有幽禽堪破寂空階相對道心存

悲哉甲戌行

父老相見但流涕悲哉今又逢惡歲
昔年瘡痍未全復如何旱魃更爲厲
火雲下燒陂池乾大地正熱人心寒
禾苗枯死衣典盡十戶九戶無朝餐
野藕鋤罷汗流頰更剝榆皮作生業
不獨牛羊性命殘可憐老樹亦遭刼
此時千里窮富平饑民道路紛縱橫
嗷嗷鴻雁尙遠征誰家村巷來哭聲
老翁病死方未葬且鬻妻女聊延生
生離死別聚一刻此際遑論事重輕
哀語未罷復痛哭徒令聽者難爲情
我聞貧兒恃行乞今雖行乞難存活

平原一望炊煙稀幾家有食能療饑道遠走困神力疲坐委夢
草人不知古稱救荒無奇策策在豫備非旦夕常平倉立原爲
民臨時調濟亦可益東鄰昨日趨市廛斗米如珠空垂涎領來
一月捐賑錢饑軀只可三日延君不聞廬江婦去鄉里足弱何
能遠流徙困饑且向草間止嬌兒懷中啼不已自分流離必路
死抱兒直赴長河水又不聞去城百里有老農平時溫飽氣頗
憐一旦女家去稱貸歸來羞憤嫌手空殺雞食衆潛置毒八口
狼藉尸血紅安得焚香請蒼穹下令雨粟遍寰中頓教雪後生
春風吁嗟人家粟盡如水火李悝之書廢亦可不然百萬民命
懸太清諸君看我甲戌行

平默庭節端索題點易圖

圖中何所見三十六宮春一晝已多事千秋誰解人元機隨處

覓妙義爲君新河洛水東去茫茫獨問津

下筆得珠船知君未肯宣入懷看月落仰首羨飛鳶悟到深宵後神游太古前當牕有修竹好與證遺編

得意空霄壤忘機自古今有風來水面此處見天心四聖各無語一編知素襟尙多言外境捲卷更沈吟

桐陰閣歲暮

廿載年華客裏更空齋坐聽露淒清有家翻作關城別薄酒難爲雪夜情入夢江聲留彷彿帶寒星色倍分明東風消息無人管寂寞春愁次第生

咏月

一片龍山月雷川伴客明圓時翻惹恨缺處轉多情惜句詩難就消寒酒易傾閒階雲不掃樹影任縱橫

哭万子固

京華一病未兼旬

謂得病七日遂沒

痛惜天涯玉立身
藻苑有才能樹

幟瓊枝無力永辭春
西園賓客留遺迹
南國風流少故人
每到夢中兼醉後
模糊猶說信非真

十五夜月

十分瑞靄護岩端
花影重重露亦團
今昔圓消千載恨
山河照盡一輪寬
天非有意增顏色
人自關情強笑歡
猶恐高空霞散去
仙風吹透水晶寒

孟塗後集卷九

桐城劉

桐陰閣上元卽事

樓臺四畔影瓏玲玉管誰從隔岸聽燈火江村難掩
界欲無星芳塵隱約隨車去香霧朦朧爲客停最是赤闌千外
路夜寒人靜酒初醒

自大雷渡江抵皖阻雨

江平風濤波千疊青天入波面生摺今晨我自雷陽涉片雲繫
在蒲帆葉春來水急風力輕下流勢與風怒爭居然破風走百
里撥雲露出皖公城雲陰壓地天乍黑冒雨徑投寺樓側古佛
相對疑舊識病僧訝我風塵色亦知客途宜耐寂地近故鄉遲
不得人生真識行路難慎勿輕爲歸思逼

江亭小住感賦

倦倚高亭酒正闌，尋思舊事去無端。
半生花月填離恨，獨客風霜謝冷歡。
故國春從書裏到，隔江山入夢中寒。
歸時定徙西牕榻，自剪蘿衣住碧巒。

喜陳大燮過訪坐談達旦卽贈

四海論交日，當時得雪樓。
謂陳大治似君殊獨絕，遇我後千秋。
興到非因酒，詩工不藉愁。
江亭最高處，珍重一宵留。

相訪月明下，歸遲僧閉門。
別來春又冷，坐處室爲溫。
薄酒深情在，孤雲此意存。
今宵歡已盡，不用更傾尊。

喜徐六襄農部歸里卽贈

翔鳳凌霄振羽翰，江花春落彩毫端。
歸來舊雨仍年少，別去長安識路難。
八載雲煙驚著草，一樽懷抱對春寒。
金倉早繫

君王念珍重臺郎待濟艱

初夏有感

親知海內半朱輪
劍南天去住頻到眼
風光乘別恨驚心雲
物革殘春繫舟溪柳
誰同折著雨墻花且
自新沽酒就隣須縱
飲倚樓猶是故園身

江樓看月

樓高收得月明多
四面天光接水波
遠岸竟難分曉夜
此身直欲到星河
忘情我說他鄉好
佳會天留獨客過
日日遲眠惜風景
年華猶覺易消磨

隱几

隱几和明月當牕
對遠山倦游非愛靜
小病學偷閒人與酒同
淡鳥呼春不還唯應芳草色
青照別時顏

姚幼樞孝廉自都回里時客皖城訪余于江樓爲竟夜之
談成此奉贈卽用留別

江光盡處野煙浮高館風生氣欲秋四海倦交今識子十年懷
舊共登樓歸來虎觀誰詞藻別後龍文鬱斗牛鄉國乍逢謀痛
飲茫茫身世正多愁

深宵四望露淒淒坐久高談不盡情江水平隨人語靜月華近
向客心明千秋未定能知我萬里曾游浪得名慚愧風塵行太
促寸懷從此爲誰傾

贈朱魯岑

世俗輕游客文章賤布衣飢寒吾道在天地此身微君昔矜蘭
佩人誰攬荔帷理源河漢遠詞藻日星輝道屈才難展行高衆
易違中年猶落寞同輩已輕肥似我交憐晚論心見恨稀清秋

懷一劍白日掩雙扉事業存行卷勲名矢釣磯酒看今夕醉名
悟昔年非每欲勤餐菊相期咏采薇南山有鴻鵠志不慕高飛
題趙子昂畫馬

神妙江都早軼儔子昂此法亦千秋人間久已無騏驎真種還
須向畫求

金勒紛紛盡駑駘圖中今日見龍媒不須九馬爭神駿一骨能
空絕域才

圖中止
一馬

杜陵長句將軍筆畫手詩家各擅能寫出風雲千里足莫教紙
上便飛騰

書憤

萬卷吟殘忽雨聲廿年古恨積難平時清正士偏分黨俗濁庸
夫恥好名得路鸞皇憑自許當場蠻觸苦相爭成功儘有尋常

輩一歎難邀阮步兵

途中贈姚丈度疑

江左論文物詞壇屬老成風流空往事邂逅足生平小艇容高
卧衰年耐遠征聽來終夜雨猶作故園聲
我尋雷岸月君挂秣陵煙今昔同爲客江天忽叩舷雨聲消酒
渴雲影入詩禪老去豪情在相期采玉蓮

明珠

明珠一顆出于闔生小玲瓏鬪月圓妝罷細看雲尙薄倦來不
奈柳初眠酒寒南國三霄後春記東風二月前最好華年工怨
思可憐錦瑟恨多絃

瓊花顏色水雲思正值瑤瑤日暖時剪燭拭將臨別淚惜春留
取未開枝愛聞弱海愁行遠有約琅霄恨到遲說是三生惆悵

事人天望斷玉參差

雜憶

少小事游戲蘭房笑語頻未知君子意不敢遽相親
翡翠琢爲環鴛鴦繙作結生小愛嚴妝非關鬪花月
花飛貼儂袖拋去落池心小鬟不解事故自逐蜻蜓
冰蠶絲百結宛轉久纏綿爲感金仙顧吐向春風前
乍近翻疑恨重來轉自羞可憐新柳弱今始識春愁
驗彼芙蓉瓣紅留一捻痕不須當日坐良玉自然溫
芳香悅人魄况復未開時還須傍花立他日費相思
將來綾一幅繡出似迴文彩鳳銜花舞枝枝紅向君
儂有名香串紅珠粒粒圓贈君無一語懷此已三年
來時怯春寒去時歎春暮此心直隨君數遍去來路

欲語寸心難離懷強自寬恐妨花見笑速遣淚痕乾
莫問後來期情多喜亦悲神風共靈雨離合總狐疑
瓊瑤曾夢想託契愛游仙聞說銀河淺相隨泛月邊

荅程仲芳見贈二律卽次其韻時仲芳與余有同居之約
卜得深林徑桃花水七重爲君遂初約對我破愁容石室春長
住瑤田歲豈畝躬耕同此志夙慕北山農
人結素心友山如太古時棲鸞宜翠竹替鶴覓靈芝雲影欲留
迹樹聲時到帷此中塵世隔珍重十年期

自大雷同皖僑寓陟園清暉閣

客途久已倦征輪暫假園林一洗塵樓與江山爭暮色
人當霄漢寄閒身逃名我愧韓康伯縱酒誰尋賀季真城郭萬
家空在望此心唯共水雲親

樓中暇眺尤佳

雨中望大龍山

煙雨微茫裏龍山欲到門入江唯濕翠壓郡尙飛雲檻外峯奇
秀天南氣吐吞懸知岩僻處猿鳥自稱尊

小別

小別渾如醉相思空復春妾心與郎面一見一回新

清暉閣獨坐

芳草共斜陽吳天極望長浮雲自明滅遠水合青蒼勝地身嫌
俗勞人夢亦忙好憑此高閣獨坐卜行藏

夜感

華燈無燄照鄉情夜酒初闌劍影橫古徑樹深沈月色高樓人
倦枕江聲西牕風雨虛前約南國雲天累此生明日桐川歸放
槳入山先遣鶴來迎

時將游九曲

新月

春氣感人速好風當夜來
妾心自驚覺不待繡幃開
啼鳥乍呼春煙光薄未勻愁
顏日如故人說歲華新

樓中消夏

惜春况是游歸後
消夏難勝睡起初
連日正嫌花事少
一生愛近月明居
樓中煙雨詩情併
江外雲山客夢餘
日坐畫圖身不覺
愁城尙仗酒攻除

孟塗後集卷十

桐城劉開明東

咏二喬

辭卻深閨傍將臺天生佳耦自無媒千秋姊妹傾城福一代君臣快壻才遺跡人空尋建業故居地合近蓬萊芳名原數東吳盛金粉南朝事總哀

幕府雲深隱畫樓千戈粉黛豔揚州能空青史多情累一洗紅顏薄命愁年少英雄皆眷屬偏安家國擅風流江南亦有如花女自惜容華怨蹇修

題姚丈愷臣集

劍鬱青霞筆走雷平生懷抱肯輕開半空雲錦先秋製一夕河聲歷紙來老去人猶推碩望數奇天亦妬公才硯南著述千秋

事珍重書成續玉杯

哭姬傳先生

靈光海內慟無存多士同聲哭達尊星日至今懸鳳藻東南從

此失龍門神歸寥闕關天意福占名山亦

主恩漫說九州多岳瀆眼中何處睹崑崙

早年染翰重西清壯歲辭榮出

上京

時某相國柄政欲保升侍御史先生竟以此辭歸

淵府竟從滄海拓景星長近故

鄉明百家陶鑄歸宗匠一代人文屬老成今日風前多少淚傷

情不獨爲師生

筆頭風雨泣無端卷裏龍蛇鬱怒盤身後集教千載定斗南天

爲一人寒平生學與時賢別垂老躬逢曠典難謂重宴鹿鳴回首三

冬長立處當年積雪未曾乾

歐門賓客筆如椽玉局深蒙永叔憐四海論才偏我獨開初以書謁

先生謬蒙教賞有一生知已更誰先別來夢斷金陵月哭罷秋

國士無雙之稱

殘皖口煙譜得水仙新操就海天無路覓成連

題洋畫

曉樓煙淡籠輕綺花枝約寒聚瓶水佳人身在碧琉璃綠波一寸吹難起家傍天南半月山求道無如擇壻艱自知絕色難爲匹妝罷時看鏡裏顏學仙不向洞天住數遍峯頭蝶來去早識春風落畫圖悔不藏形入雲霧珠江淪落疑塵埋有人千里攜歸來不因碧海丹青手那遇瑤臺曠代才神光離合映紅壁月華界面淚痕積春愁如夢尋無迹對儂不語已三年良霄獨立春可憐

姚幼樵孝廉以寶刀見贈口占四十字報之

別主寧無數雄心爲我傾從今風雨夜莫作不平鳴
萬里行相伴難忘解贈情防身原有術聊借作干城

哭定南刺史蕭蒙泉

一別偏無再見緣交情存沒只三年貧因祿仕官翻悞死忌人
知我尙憐身後妻孥餘涕淚篋中雷雨認詩篇章門便是山陽
地不待重過已慘然

將赴都門留別里中兼寄東南諸友

河干垂柳故穆穆北上征車欲駕驂挾策年仍慚少壯看山我
已遍東南花因別主開含恨酒到離筵少亦酣從此遨遊非舊
地風煙一路喜初探

直北關河護

紫宸蓬萊宮闕望無垠

鞦韆紅奪千門日

禁柳青收萬國春
畫閣勲名原曠代
登壇詞賦更何人
攜來南粵珊瑚樹
擬向銀河結釣緡

龍眠千疊是吾家
嶺表歸來不泛槎
一別夢寒滄海月
三年看老故園花
酒痕狼藉餘芳草
詩思孤騰逼暮霞
聞說上林春似海
東風遲我到京華

花鳥前途問去蹤
望中樓閣隱葱龍
幾年碧海期空近
二月黃河凍不封
破浪知憑雙桂楫
愛山難別九夫容
莫言此去知音少
伯樂原從冀野逢

名區閱盡向幽燕
懷古多情住玉鞭
白雪有歌人兩地
黃金買骨事千年
已從南國辭江表
漸看中原到馬前
爲報相思須北望
少微星過楚雲邊

途中口占

碧沙漠漠草蕭蕭人別江南路正遙忽覺鄉心滿湖水數聲歸雁度雲霄

哭丁丈薌林

文物東南盡

調姬傳夫子

凋零又老成精靈空嶽色意氣落江聲偃

蹇深林志淒涼後代名天高如可問願爲訴平生

痛惜陵雲氣沉淪六十年禿毫仍異采衰夢尙前賢此別悲千古孤懷隔九泉向來知已淚重此灑江邊

江行卽事

浪花紅上釣魚船人泊斜陽酒市邊樓閣夜深簾透月江天春醉柳眠煙吹殘愁思唯宜宿買盡雲山不使錢徑挂孤帆向京口金山寺下水如天

抵揚州

金碧凋零剩墨多揚州無奈客心何紅橋岸上青青柳三月煙濃不過河

漕河曉發

河隄北望旅愁生千里鄉關客獨行雲氣半天林隱現湖光四面日陰晴衝寒野艇添詩境破曉微風讓櫓聲見說桃花春漲減江淮鳴雁不勝情

黎湛溪河帥招飲奉贈

天南高處景星懸使者來從北斗邊時方入署驚賞幸逢千載下受知已愧六年前書牕月白疑親客幕府燈紅正啓筵攜得鴻篇歸去讀袖中不覺雲煙

淮城有感

金隄一線接江皋，澤國西風起暮濤。
雁下雲中先客渡，河從天半壓城高。
全淮地勢陰寒集，旅館春心去住勞。
不信元龍生此處，到今意氣復誰豪。

春流直下海雲間

時海口舒通

使者巡河自此還，風浪有靈三月靜。

魚龍不動萬人閒，安瀾久爲蒼生慶。
上策先聞

紫殿頒

時方修治河方畧

從此淮徐皆樂國，我

皇南顧霽天顏。

無雙國士困塵囂，憑弔淮陽舊迹遙。
一飯王孫悲失路，千秋楚水變前朝。
風雲不假奇才便，鄉里能令壯氣消。
明日登車更回首，釣臺春暗草蕭蕭。

天涯踪跡慣風波，一夕春愁去渡河。
南望竟同花柳隔，北來唯覺水沙多。
半宵離夢難聽雨，百里平原不見坡。
可惜枚皋擅詞

賦游梁歲月早蹉跎

渡黃河

片帆截處走驚雷到此能雄亦壯才
星日氣皆隨水變泥沙源
豈自天來濤聲馬上偏穿過春色
江南惜界開最是客愁流不
盡茫茫心事浪雲隈

宿遷道中

平遠飛沙入大荒征途人共馬蹄忙
雲連曉氣寒猶白天到中
原色盡黃宿國風煙春闌淡項王
居處日蒼涼壯游久負男兒
志弔古翻教憶故鄉

道上見梨花

風光拋我已天涯自到江南見此花
薄暮客心看不得動人春
色正清華

將至泰安口占

垂楊夾道水瀦澗破曉東風送客來欲謁岱宗無介紹雲中先
自揖徂徠

登泰山

坐鎮神州接太清尊嚴未肯闢奇橫地擎日月雙峯挂人共風
靈一處行河遠帶從空際繫路高天向鳥邊傾破寒不待晨光
白要聽金雞第一聲

青天一線石爲門紺壁長留太古痕地迴自能通造化身微敢
便小乾坤崖開洞府神爲護山起平蕪勢更尊極目萬仙樓外
路遠煙數點是中原

巖端小語碧天聞足下紅泉帶紫芬古樹春消秦代雨斷碑人
掃漢時雲瀑流怒捲驚風至海色高從絕頂分七十二君遺迹

盡金泥何處覓靈文

至絕頂復成二律

萬里仙靈集天門夜不關入懷都是霧到眼更無山海日紅全
濕雲霄碧有斑丈人峯獨立對我展愁顏

一覽煙嵐盡山河到石旁九州無界限萬古止青蒼游子雲衣
薄天孫玉闕涼回頭望松柏黛色已茫茫

抵濟南觀趵突泉

百川分道流向東憑高趨下千古同天公忽欲破此例仙源倒
出馮夷宮飛流上穿地爲裂石旁湧出三堆雪直從水面起奇
峯霜花欲散仍凝結一重波落一重生勢若銀浪來相爭風雨
驟至不能遏寒光飛動搖水晶疑是神龍久伏不肯出口噴雪
沫灑太清靈泉氣悶洩無處出地時作不平鳴不然水仙好游

戲轉下爲高豈無計水中伎倆施已窮突從平地展神異地潔
如聞山谷音流清不帶魚龍氣此泉伏見豈偶然四時不竭如
神淵托身不借高山境獨力能開地底天我聞濟水性清急黃
河雖大勢難敵纖塵半點容不得恥與羣泉爭地行獨自潛流
出山側唯此變態成激湍風霆作聲水作色已讓江河派占先
四瀆名羞居末川地中隱迹千餘載辭作人間第一泉

偕徐丈游大明湖

淺碧波心暮靄橫隔亭人在畫中行一天雲影長搖岸半面湖
光不出城短葦界成煙水路微風低應酒船聲七橋名勝今何
在望遠難爲旅客情

陳笠颿中丞邀同觀珍珠泉

濟南之山秀無比濟南之水城中起天開勝地出靈源七十二

泉從此始我從山左騁游踪登岱手折青芙蓉紫鸞呼我未肯
去爲謁使者下雲中使者置酒快胸臆花徑不掃翠長滴相攜
同看珍珠泉方池影亂瓊瑤色是時風定無纖埃水中雲散天
自開明珠倒從水天落出地無聲時湧來纍纍有源不知處人
言地下無根蔕但見一氣噴薄成此狀直上不肯稍盤迴前珠
纔沒後珠出欲斷不斷勢相續初見連珠生兩旁忽然一串走
中央小舟蕩入雲乍黑珠亦隨人浮水側分明衆顆一齊來及
至水面轉無迹珠泉之異世所無我今對此生歎歎世人藏珠
動盪篋玩好徒供七尺軀何如此間泉萬斛吐出珍珠意未足
流作溝渠養萬民珠圓點點勝金粟使者且勿誇奇觀眼底齊
州天海寬濟人自有長流澤莫惜如珠一樣看

孟塗後集卷十一

桐城劉開明東

齊都懷古

郊原地敞盡耕桑誰問龍門講業場
大國聲華惟海岱古時齊魯擅文章
黃河南走移風氣紅日東窺出混茫
欲覓營邱何處是野煙九點正青蒼

平沙莽莽接登萊十二河山勢壯哉
海嶠敷名循吏古魚鹽生計此邦開
仲連性逸原奇士呂望謀高總霸才
憑弔漫嫌饒壯氣登臨曾到岱宗來

連天飛閣隱雲東寂寞於陵迹已空
一李竟能同槁餓二桃何事殺英雄
青燐遺恨春風裏白日驚心客路中
指點前途識關吏棄繻我已愧終童

海邦形勢擁寰瀛雞犬徒聞四境聲仲父成功由鮑叔昌黎失意感田橫論才久薄三千客懷古頻看七十城莫笑牛山揮涕淚古來人主慣多情

車前一曲飯牛歌白石當年勝蹟磨稷下不聞談士至濟南惟有好山多全齊風景難爲住三月春宵未易過明日玉鞭西指處黃雲北望塞滹沱

將抵都門言懷寄呈諸先達暨同遊衆君子

九衢駟馬集煙寰有客乘車獨叩關才拙自宜甘短褐時清敢說卧名山拜颺天上麤龍在來去人間鳥雀閒咫尺燕南風景地好雲待我更開顏

離懷日百壓征鞍吟到燕關路幾盤西北山形爭怒出

禁城春色總高寒齊來造化千秋易脫卻風塵日難不是昌

黎心太熱同游多半在長安

少小耽奇似玉川江花關柳住吟鞭不辭別路三千里已客諸侯十五年失志厭傾吳市酒有才須賦帝京篇洛中故友都相諒季子原無二頃田

慚愧虛名遍楚邱此來卻未應徵求敢因謀祿干知己直爲驅愁作壯游俠士須尋燕趙地詩人多住

帝王州推賢況有韓安國珍重文成學鳳樓

閨情

芳草碧無盡游絲雨許長郎行渡河北妾夢久漁陽鳥語無人記春心有淚將願爲連理樹時集紫鴛鴦

喜周南卿來都卽送回里

三年不走江南道野花爛漫如春草東風無主鶯亂啼相思不

見令人老蹇驢獨自上長安新知強對難爲歡君來一見忽驚
叫頭上墮卻芙蓉冠書生那測天心意顛倒才人若游戲聚散
瞬息無難易門前車騎鳴金珂南歸秋氣臨關河故人對面風
塵多有懷不盡重相過樽酒尙溫奈別何

題黃明府竹裏彈琴圖

修竹淡秋色枯桐傳素心一彈清晝晚四顧綠雲深太古境如
此空林天半陰莫嫌人不覺好月是知音

贈萬香海

早時同聽楚江濤駐馬長安首更搔萬里春愁隨客至十年別
思爲君勞樽前氣挾西山動眼底雲橫

北闕高今日縱談須就我勝他痛飲讀離騷

胡小東比部以五言見贈依韻酬之

不謂吾來晚，翻令子破愁。雲天今意氣，肝胆舊交游。
驚聲騰漢驥，麟骨耐秋樽。前休論士冠，愧愧南州。

哭錢芷汀

風霜傲骨瘦嶙峋，自昔名高楚水濱。下吏有才能殺賊，元戎無力憚推輪。
米家書畫長安重，庾信文詞晚歲珍。一卧滇西驚永別，人生難定百年身。

陳雪香少司空以督書圖索題因作長句

侍郎好古兼好士，不屑徵奇向書市。秘函萬種來有神，乃與人
才同聚此羅胸。豈止十牛車持衡收俊，天南隅網窮碧海出光
怪。峩峩百尺珊瑚株，登堂拜見盡瑰質。以書爲贄世稀匹，奇氣
驚從紙上生。古香頓向坐前出，先生對此開素襟。一卷直抵千
南金，異書得自奇材手。摩撫都存鄭重心，我聞姬公贊隆治。且

夕精勤各殊致見士七十讀百篇公乃合之爲一事真是千秋
文字緣成全轉賴憐才意槩几雲煙紛且陳圖中風日長相親
門前卽是鄉娘地好藉今人識古人我有琅書覓難得赤石斑
爛紫霞色靈篆逢公未敢藏獻來願請張華識

懷吳理菴先生

冠蓋盈京洛斯人獨草萊著書名日月失意筆風雷澗古澄泉
定山深宿翳開何當集茅屋花下倒金罍

與栗原夜話

亦識深談誤其如足愛停秋餘孤月白燈對兩人書不厭連旬
醉翻愁獨夜醒有懷須更盡雨過願同聽

朱蘭坡侍講索題雪夜綳兒圖

朔雪降深宵嚴風驚棟宇父病忘兒啼慈母心獨苦抱兒過鄰

廬天寒雪封戶兒寢方無聲母淚正如雨

雛鳳出丹穴骨格勝青鸞轉盼天風生霄路振羽翰宮錦雖娛
親春暉欲報難回憶綳兒時風雪愁漫漫母手未云酸母心亦
已寒

燕臺有懷

北來形勝壯山河攜得吳鉤手自摩地敞關門無峻勢時平燕
趙息悲歌途中風雨烏聲急客裏年華馬足磨試向盧溝橋畔
望月明還比故鄉多

平津東閣向雲開長揖高門短褐來草野何能稱國士公卿猶
自惜人才築宮地遠雄風近買馬臺空駿骨衰獨有麴生相過
密只堪餘事掃風雷

冠蓋如雲滿

帝州高陽醉亦長游沙塵欲變三春色冰炭同經六月秋客
過燕山都負氣我來易水不知愁如何鸞鶴飛翔地浩蕩偏容
一野鷗

中山西去路連延城邑蒼茫感昔賢枉有莊生能說劍可憐鄉
衍倦談天望中河朔歸雲外夢裏江南落枕邊寄謝同游好才
藻承平無事勒燕然

良材自古數明駝日日鹽車曲巷過冀北何曾聞馬貴城中從
此閱人多西山雲散晴初曉

太液池深水不波終是

皇居恩近處一秋雨澤最滂沱

早年橐筆悔長征路入三關險盡平弔古休看遊俠傳感時偏
少別離情田光義竟無人惜樂毅才原異國生漫道恒山居太

遠地寒猶得傍

神京

送馬元伯水部之奉天

遼陽風色冷征袍渤海看君掣巨鰲臣職豈宜論遠近

君恩原自念賢勞凌河地濶黃沙積鐵嶺雲開白日高攜得風

詩三百去長歌正好當離騷

君方補
箋毛詩

壯游從此盡塵寰自古男兒愛出關早歲人憐行路速中年天
假著書閒羅胸文史千秋志入夢家鄉數點山計日

詔書憐遠績

許歸猶是舊朝班

胡墨莊侍御招飲偶賦

君昔使南海嶺梅猶未花歸來攜五老含笑入煙霞贈我以詩

句離情空水涯寧知今夕酒纔得醉京華

送湯敦甫閣學典試江南

報道歐陽作試官江東一夕定彈冠雲霄愛士心常熱冰鐵無私面亦寒六代文章齊入鑑三吳人物看登壇樂天久荷稱佳句寂寞長安住正難

客中贈朱歌堂

五載關河夢三冬雨雪詩因人成去住久客拙言辭歡淺書難續愁來酒不支可堪燕地月同照露寒時

贈萬香海

落筆無前古論交盡異鄉詩懷天浩蕩人世淚蒼茫杞梓材偏拙驂騑氣不揚點蒼高有路誰爲促歸裝

送帥仙舟少司寇護蹕熱河

重臣隨

蹕自長安秋色蒼涼帶曉看萬騎雲從空際出九州天到輦前
寬爽鵬威望聞關塞羽獵才華勝漢官身在

至尊溫語處

恩深不覺近邊寒

醉歌行卽席贈聞古芬刺史

黃鵠一去天馬逝人間何處求神異茫茫草澤猶無人况乃作
吏趨風塵古芬霑落氣道上一言霽宇開朝爽詞壇不屑稱雄
師俠骨獨類幽并兒熱血淋漓出肝膽英風凜烈生鬚眉造化
苦之不受東窮來氣卻干熊羆才鋒勁利快無敵芙蓉劍鏑無
顏色太阿未出寒先生千里一步留不得酒酣放論窮高深絳
蠟沈沈照此心三人相顧重沉吟樽前意欲無河漢眼底才空

數古今人生富貴何足羨看君異日奇功建李白欲燒頭上巾
今我胡爲守空硯吁嗟乎裴公不作昌黎死千秋此語難聞矣
君且藏之勿示人余亦狂歌去燕市

酬張溟洲比部

使君才望本超羣犀角光寒水自分拂袖直攜溟海月盪胸會
納泰山雲西曹人物推前輩東國循良憶舊聞謂昔濟南守十載傾
心逢恨晚可能無意杜司勳

送李芝麟學士視學浙江

新承

異數拜

恩榮天上鸞皇看此行東海狂瀾須手障西湖止水見心清人
文兩浙歸宗匠澤國多才望後生料得孤寒瞻使節梅花驛路

早相迎

題陳仲卿泰山觀日圖

夜半天雞唱金輪地底回影隨波勢出紅破海雲來人世蒼茫
見林光次第開登臨當此地費盡楚騷才

仲卿著
有海騷

重有懷

居庸天險聳雄關坐擁

宸居勢拱環上接重霄唯紫氣南來千疊靄青山馬嘶古戍行
人遠鴈縱平原壯士閒獨羨玉泉拖素練石螭吐處響潺湲
寒雲直下壓滹沱南望平沙一鷗過河北名城天下重范陽戰
氣古來多艱難光武偏師苦寥落軒轅故迹磨今日時平風物
勝薊門煙樹鬱婆娑

波光瓊島近難尋客路寒教歲月深易水黃金憐死骨幽州白

日淡秋心伯桃交誼隆霜雪賈島才名亦古今何以漁陽張太
守歌詞遺愛重桑林

中都形勢扼金燕遼苑妝樓已化煙蕭后舊時曾對月昭王晚
節愛求仙林中王母同游日海外佳人鬪舞年故事不須煩再
問盧溝曉色滿平川

車馬長途西復東激昂懷古氣誰同樂生來去燕成敗遼主憎
憐晉始終五季荒唐兵革內七雄忽遽夕陽中迄今四海修文
久關塞蕭蕭自朔風

西山崛起

帝城隈中有陵虛百尺臺流水千盤從下注太行一氣向東來
峯頭霽雪頂巔積澗口橫空紫翠開坐對畫圖游未得秋風惆
悵故人林

陳頌上編修屬題桐陰草堂圖

一榻寄天壤孤桐共古今碧雲疑在地白日淡生陰卜宅平生志他鄉舊日心聽來疎雨過猶作故園音

古石共幽篁怡情半老蒼靜懷忘晝永此處覺秋長身世餘芳躡雲天一草堂披圖還細認是否舊山房

出都留別桂舫先生

朔風蕭瑟動高林人去猶留未盡心薄海交游從此倦平生知遇竟誰深雲離卿月疑無色鶴別丹山欲變音也弇公門親植樹三年噓拂未成陰

虛名久已愧南州自昔登龍忝勝流蘇軾文章驚一見魏公德量本千秋窮途始覺知音貴高詎難將隻字酬不是瑤壇詞伯在長安底事漫來游

涿州咏蜀先主

能教王佐出隆中百戰纔收取蜀功半世依人同旅客一生知
已是奸雄兵戎婚媾丹陽宴骨肉君臣白帝宮今日故居遺跡
盡不須恩怨說江東

孟塗後集卷十二

桐城劉開明東

登車

徑去休回首沙塵促馬鞍
愁心看落日淚眼別長安
燈影偏搖夢河聲但咽寒
乍逢同路侶不敢話悲酸

真定道中贈客

一出燕關道蒼涼滿目情
黃塵連白日秋色未分明
寒壓征袍薄窮教客命輕
相逢徒北望我已別

神京

抵順德

日慘雲無色風驚葉有聲
四圍川野合千里地天平
趙國空遺跡幽州盡此城
生平虛壯志歲晚尙長征

渡漳河

漳河水遶岸雲隈暮色蒼茫樹影開多少西風懷古恨夕陽無語送人來

銅雀臺懷古

高城寂寂倚蒿萊魏武當年總帳摧東國雄心吞漢鼎西陵朽骨戀銅臺艷姬歌舞荒春色亂世風雲感霸才衰草墓田無處覓英雄兒女總堪哀

過邯鄲

漳黃北去氣蕭森匹馬南來日已陰落木關河經倦眼感秋身世集歸心辭家雲路三宵雁壓夢鄉愁獨客衾關過邯鄲游興倦歌臺羅綺惜銷沉

宜溝驛看月

江南河北月同清一樣秋光帶別情對酒每憐孤影瘦思家轉怕十分明名賢舊里空荒草謂端木子沫土遺墟沒故城不信素娥好顏色曉寒猶爲照歸程

抵汴梁呈阮芸臺宮保卽用留別

入山須躡崑崙邱入水須探黃河流千水萬山游欲遍仙人招手青雲頭賤子風塵長落魄十年枉作諸侯客交滿天下誰知音阮籍途窮眼空白先生當代文章雄忠誠上與神明通韓范勲名本經術胸羅萬象開羣蒙廿年持節動寰宇到處蒼生沐陰雨下令能教塵不飛吐詞頓覺雲驚舞憐才收盡東南英手栽碧樹干太清鐘鏞之器珪璋質一一皆作鸞鳳鳴嗟我至今猶無成秃筆怒與風雷爭先生一見不揮斥滄海同波山岳傾大梁十月霜花密軍門風靜角聲出談深不覺羲駕移使我披

雲睹天日獨恨書生遇公晚霄漢間風隔寥遠昔公開府天南

端絕頂湖山擁將壇

請在浙西

煙光濃淡供詩用海氣蒼茫落紙寒

幕天席地無不可一時人物勝江左

可惜微軀滯大雷未得前

趨北海坐西江買棹徒追尋涼秋未值使車臨誰知此地春風

近得了江天十載心人生會合原有數受知何必嫌遲暮前路

處處阻煙樹看公掃翳除陰霾龍門正對嵩岳開中州文獻雲

煙集河洛精靈風雨來我有幽懷不敢訴感公高義生遐慕臨

歧欲別仍回顧河聲嶽色不我留攜將風景江南去

喜晤馬伯固孝廉

不有今宵聚

翻孤

八載心客中嫌見晚別後覺交深斗室論天

地奇懷破古今我歸君且住珍重鳳鸞吟

中州懷古

薊門山色壓歸裝，閱過幽并，向大梁。
四海路經天半，面孤城人坐地。
中央平原風冷，霜花白，西楚雲連曉。
氣黃嬌，首高陽，荀里近德星，今日聚何方？

沙塵四起，暗朝昏，形勝東京總莫論。
魏國河山悲棄險，宋家興廢問。
頽垣干戈花石無顏色，風雨冬青有夢魂。
一樣故都城闕，變登臨人只憶夷門。

七雄戰騎日紛紛，公子名高氣薄雲。
終惜十年留趙國，竟思一死赴秦軍。
如今屠市無人物，自昔高皇尙聽聞。
好士偏能接崖穴，千秋誰似信陵君？

北渡漳流望太行，西從滎澤覓敖倉。
龍蛇鬪罷雲疑冷，金石銘殘草亦荒。
白晝陰迷艱雨雪，黃河遷徙卽滄桑。
行人漫問金堤道，衰柳蕭疎自夕陽。

梁園舊日擅文詞十月經過有所思池館空傳人去後古今同
是雪飛時馬卿辭別纔游倦李白高吟已恨遲荒徑迷離草蕭
瑟疲驢虛載一囊詩

步兵痛哭爲途窮廣武山前眼界空未必成名皆豎子由來顯
世少英雄風雲寥落千年內人世蒼茫一歎中莫向戰場論勝
負幾人遺恨付高穹

緱嶺笙吹曉日邊當年子晉竟登仙飈車是否鄉人見石室虛
迷父老傳作帝無緣輕紫蓋升霄有福正青年書生遠踏淮西
路悵望飛鸞已隔天

過徐州偶懷

煙水抱城來黃樓天半開有山曾繫馬今我獨登臺豪傑飛騰
地文章跌宕才坡仙遺跡在憑弔漫生哀

至金陵呈松湘浦相國

手轉洪鈞植地維豫章千仞聳高陲才兼將相

先朝重身繫安危

聖主知上國風雲聽約束中天日月看扶持卽今召伯巡行處

一體陽春育物慈

多年塞上駐蜺旌坐鎮關河鳥不驚謀

國心常懸

魏闕安邊

帝倚作長城一門秉政原

殊數獨力同

天出至誠清夜焚香還似昔甘霖早已遍蒼生

姓字能教海外聞起居異域問殷勤

謂使咭明國貢使

胸中十萬橫摩

劍筆底三千奏牘文北面公卿皆後輩上臺聲望屬郎君最憐
梨几多清暇潑墨時翻碧漢雲

韓范忠勲動

廟廷擎空一柱出滄溟千秋風節歸元老幾度東南見福星地
極臺司頭未白路逢國士眼長青樗材自愧淪窮壑幸遇黃河
納渭涇

水榭觀月

秦淮水淺寒且清水中有月光滿盈取石澣水月破碎一輪散
作千點明須臾水定月如故玉盤托出天無聲樓頭有客吟初
成對此頓覺虛明生百慮滌盡衆竅息此心不動煙水平置酒
未飲杯已傾長天漫漫星縱橫年來萬事俱屏謝一樽如友相
伴行燈前酌罷宵漏更推牕紙響明月驚惟自閑雲不耐寂水

天點綴時有情

古意贈道舫

坐久不知疲談深露華白相知已十年相親在今夕
似君好才藻吟作鳳鸞聲如何年正弱多恨復多情
酒酣還促杯燈闌更秉燭那能當此際不願吐衷曲
以我游倦後逢君興發初歸鴻與俊鶻相見意何如
痛飲忘故常謾言無譴責此會信自難當時別可惜
春華難久茂惜此青雲姿看我齒稍長興已非舊時
自是情太深轉覺爲歡淺不量寸心微與君期久遠

奉酬唐陶山觀察

我於藻繪初未工不知當代誰稱雄有時塗錦鬪人巧忽欲鑿
險窮鬼功陶山先生今詞宗力拔豫章同千熊聲發殷與河漢

通筆底異色鬱光怪化爲丹氣浮空濛生平政績追召翼憐才
更復兼文翁餘情浩蕩寄詩句豈比曲士矜雕蟲酒醒興發橫
高穹坐空得失忘愁窮置身忽若到太古放論不覺驚羣聾東
有滄海西崆峒黃河蜿蜒盤其中吞吐天勢噴雷雨公之懷抱
將毋同揮霍百家役諸子金碧絢爛歸磨礱自我出都見老宿
意氣跌宕無如公公亦謂我有奇骨神駿且欲凌霜臆攜句問
天忌太早辭煩毋乃瀆神聽我聞此語心忉忉思除縛采剡華
容剪空繁葉出貞幹洗磨古色成精銅以茲與公相追從短艇
亦可當艤艫昨宵飲我華堂東琉璃瀉酒琥珀紅齒頰落玉生
春風明珠見贈憐飄蓬我久倦遊困煙墨安能舊迹齊終童因
公吐氣能如虹作詩獻向青瑤宮

卽席贈歐陽岳菴

自別京華識路難
新知相揖暮雲端
開筵更醉金樽月
寂寞江南已歲寒

謝家昆季總多才
齊向風前把酒催
謾道客愁容易盡
倦懷今始爲君開

更闌銀燭淡生輝
起視明河露欲稀
坐客今宵須盡飲
主人未醉莫言歸

廬陵風調舊知名
自譜新詞雜怨聲
正是早梅報春色
爲歡可奈別離情

絳桃歌爲杜虛齋賦

月華西畔朱樓側
絳桃數株爭艷色
一株移植江之濱
翠蘿山下經幾春
一株豐幹少姿媚
嬌小未解春情思
中有一株秀且長
花弱如不勝朝陽容
光恍惚神飛揚
意態直欲乘風翔
羣將

艷景歸紅芳一枝已使春難當花底女兒正嬌麗生來吐氣如
蘭蕙恥比莫愁長二年卻幸羅敷是同歲家近臙脂巷口居妝
成水面燦華裾留連荳蔻梢頭景怕過江南二月初對樓何處
來詞客曉簾乍見早愁絕自是玲瓏碧藕心轉成萬縷絲盤結
雲鬟半露初驚羞遲回欲去神猶留闌干倚到斜陽暮不爲天
邊看玉鉤臨流對影情如許彼此寸心相爾汝分明遙隔路無
多一水盈盈不能語阿嫂昨宵新嫁來當軒並坐生嫌猜怪他
苦畏春寒逼忍把雕牕不開偷閒獨向樓頭顧久立防人忽
移步勞爾愁懷曲曲深恨君薄倖忽忽去回頭更語門前花珍
重朱顏勝落霞多情且莫戀春華東風昨已屬人家

書感

維揚小住又昇州居傍秦淮古渡頭片月消殘終古恨一燈照

遍異鄉愁拋書已棄江東筆檢句猶留冀北秋明日挂帆歸未
晚盛唐山下對沙鷗

寄懷姚幼樵孝廉

千里江流故國深相思終夕費沉吟歸來我憶長安道別久君
猶舊日心雲爲天高遲作雨鳥因風急罷投林如今巴曲都無
和休說陽春白雪音

卽事

今夜尋溪曲同環碧玉灣水流明月靜雲去碧天閒樹影密垂
地鐘聲敲滿山好風知送客代把寺門關

舟中示從弟科進卽以書懷得十一律

汝猶淹日月吾亦飽風霜一自登長道相依當故鄉青春空潦
倒白晝下行藏欲就靈氛問天高意杳茫

不謂風塵地能聯骨月歡孤舟悲喜共千里夢魂安小飲翻成
醉溫言不破寒尙憐前夜月流影照團圓

歸去原長聚天涯且暫親還將後來事細語未歸人好夢隨涼

月離愁接早春

今鵬十九日立春

旋舟知不遠皖口卽前津

聞說家山路前年旱魃橫飢寒貧富共人畜死生輕黍稷今新
盛瘡痍復未成汝歸宜努力耕讀報昇平

千丈飛紅落門當碧水流開軒延月處是我讀書樓十畝蘭無
稅頻年竹有秋到家得奇句好待錦囊收

漸喜庭幃近猶憐客路賒爲寒慎眠食就汝話桑麻興發原非
醉談深似在家未知燈火夜何處話聲譁

自汝離鄉國關山木葉飛昔曾先我出今幸並時歸弱妹情應
慰高堂願已違懸知到門日喜極定還悲

汝客猶無賴，憐余十數春。
賦憎梁苑雪，衣敝薊門塵。
弔古愁回首，登高每顧身。
親知休問訊，江海一勞人。

曠世才何益，騏驎地上行。
關河新舊字，天海去來情。
已分無歸計，那能料此生。
皖公城下水，忍作別離聲。

遇合他年事，思家手自搔。
艱虞憐婦弱，衰病畏親勞。
遊子生涯薄，羣兒意氣高。
寂寥惟痛飲，不必讀離騷。

得失那須問，言歸未敢遲。
窮愁原我事，棄擲豈天時。
星日孤帆一，風霜一劍支。
途中無限意，歸臥語誰知。

殘臘江干贈客

到此方知歲月深，客中無力惜分陰。
多才只供風塵役，一士寧關造化心。
愁思難消欺薄酒，霜寒有意逼孤衾。
天涯生計由來拙，愧爾征鴻自北林。

到家

自客長安道高堂涕淚垂所欣到門日正值望兒時容髻看無
改晨昏喜不支尙言前夜月燈下卜歸期

衰柳詞

柳株搖曳媚江汜春煙壓重扶難起只爲關心管別離轉教摧
折秋風裏秋風蕭瑟花減芳柳枝嬾嬾臨殘陽三眠枉說當時
事未向東風夢一場水雲姿態花情性偏喜紅桃相掩映收盡
人間二月愁可憐張緒會同病柔不禁春質似煙修眉共月闌
嬋娟沾來南海瓶中露嬌怯時如弱小年三春尤物君憐否風
流宜入才人手一線春光萬種情啼鶯無福能消受幽懷未遂
秋先知抵死涼颺日夜吹纖腰本自無多力况值霜天瘦損時
生生死死爲誰苦秋來憔悴總無語曉寒見逼太淒楚霧瑣重

重敢飛舞寸絲百結何能吐昔年種梅近銀河翻比人世多風
波望君不見奈愁何鬢雲綠褪空戔戔多情瀛海還相憶薄命
天人共折磨榮枯聚散真難測窺人無復舊顏色飛花入水久
爲萍春愁點點儂猶識